



Cumün da Scuol

Dal cussagl cumünal

In sias ultimas sezzüdas ha il cussagl cumünal trattà surtuot las seguaintas fatschendas:

Chüralla

L'Associaziun Scoulina Libra e Chüralla in Engiadina Bassa chi maina a Scuol üna canorta sün basa privata ha dumandà ün sustegn finanziel davart dal cumün. Il cumün da Scuol es oblià tenor ledscha chantunala da sustgnair la chüra d'uffants publica organisada regionalmaing. Quella organisaziun as nomna Chüra d'uffants Engiadina Bassa. Ella funcziuna pel mumaint cun las mammas dal di e cun la famiglia gronda ad Ardez. Pel mumaint nun exista amo sia sporta stazionara in fuorma dad üna canorta chi correspuonda però vi e plü ad ün grond bsögn. La canorta es sün buna via e vain tutta in funcziun quista stà illas localitats da la chasa Central. In vista al fat cha diversas familias da Scuol fan adöver da la sporta da la Chüralla daspö divers ons ha decis il cussagl cumünal da tilla sustgnair cun üna contribuziun excepziunala.

Zona da mansteranza Buorna

La firma Mazzina Immobiglias Sarl survain ün dret exclusiv vi da la parcella nr. 845 pella dürada d'ün on. Dürant quel temp stess la Mazzina GmbH avair concretisà seis intent da surfabrichar quella parcella in Buorna da möd cha'l cumün pudess lura vender la parcella resp. intermediar uschè cha'l proprietari actual tilla vendess.

Chamins externs

Dumondas per chamins externs illas zonas dal cumün vegl dan adüna darcheu andit a discussiuns. In blers cas esa da ponderar che chi vala daplü: l'aspet d'üna chasa/d'ün quartier o ün augmaint dal confort pels abitants. La cumischiun da fabrica ha perquai elavurà criteris per trattar talas dumondas:

1. Co es situada la chasa: immez o a l'ur da la zona dal cumün vegl?
2. Ingiò esa previs da construir il chamin: fatschada principala, fatschada vers ün üert o üna giassa?
3. Purtret dal lö: ha la fatschada ün'importanza per l'aspet general d'ün quartier o üna piazza?
4. Co es la situaziun invers parcelas vaschinas: surpasa il chamin la distanza da cunfin? Pudess il chamin disturbar ad ün vaschin o esser ün impedimaint pel passagi?

Il cussagl cumünal ha approvà quists criteris, uschè chi valan in avegnir per dar permiss resp. refusar üna dumonda.

Reclamaint da signalisaziun

Quist reclamaint chi cuntegna tuot las prescripziuns davart las signalisaziuns e reclomas privatas es gnü elavurà in connex culla revisiun da la planisaziun locala ed approvà dal 2004. Il cussagl cumünal ha approvà üna nouva versiun revissa e cumplettada.

Via da S-charl

Per cha las Ouvras electricas d'Engiadina (OEE) possan far l'inspeziun periodica da la galleria da pressiuin Ova Spin - Pradella esa stat necessari da rumir la naiv süllas vias d'access correspondentas plü bod co quai chi füss stat il cas sainza quist bsögn davart da las OEE.

Uras da fanestrigl

Daspö ils 1. december 2008 sun stats averts ils fanestrigls in chasa cumünala adüna la gövgia plü lönch, il prüm fin las 19.00, davo ils 1. mai 2009 fin las 18.00h. Da quista sporta es gnü fat adöver fich pac. Il cussagl cumünal ha decis perquai da tegner avert ils fanestrigls sco plü bod (avantmezdi da las 10.00 fin las 12.00h, davomezdi da las 14.00 fin las 16.00h).

Natüralmaing esa pussibel sco eir fin qua da far giò termins dadour las uras d'avertü-ra ordinarias, e pel servezzan da telefon nu daja ingün urari, q.v.d. chi's po telefonar dürant tuot las uras da lavur, na be dürant tshertas uras sco in bliers oters cumüns.

Bogn cuernà Quadras

Il s-chodamaint dal bogn es ruot e nu po plü gnir cumadà. Ils cuosts per üna nouva chaldera da s-chodamaint s'amuntan a ca. 60'000 francs (expensas liadas). L'incumbenza pella furniziun e l'installaziun es gnüda surdatta a la firma Guido Christoffel.

Deponias per material da s-chav

Siond cha la deponia da Parnarsura (Sent) es plaina esa da chattar vaira svelt üna soluziun almain passagera. Ils lös chi gnissan in dumonda a Scuol sun Sotruinas (reconstituiziun da l'anteriura deponia), Üschplans e Plansechs. Il cussagl cumünal ha decis d'instradar üna procedura BAB (fabricats dadour la zona da fabrica) per Üschplans e da gnir in trattativas culla possessura da quella part dal terrain chi'd es in mans privats.

Dumondas da fabrica

Il cussagl resp. la direcziun han dat ils seguaints permiss da fabrica:

- a dr. Guido Lazzarini la dumonda per fabricar oura la chasa e'l tablà sün parc. nr. 95 (Chasa Bischoff) in Vi
- a Not Neuhäusler per transfuormar l'ufficina da vernischader d'autos in ün'abitaziun

sco eir per progets plü pitschens (tablas da recloma eop.).

Cunter l'intent da fabricar üna garascha in Schombrina Sot es entrà ün recuors. Il cussagl cumünal ha decis – davo avair consultà il cusgliader giuridic dal cumün pel sector fabrica – d'acceptar il recuors e da refüsar il proget.